



Zarafshon

Fidoyilik —
vatanga xizmat demak!

2022-yil 15-fevral, seshanba,
18 (23.585)-son

**КУН
ҲИКМАТИ**

Тарбиясиз
болада илм
олишга
иштиёқ
бўлмайди.
Уни ўқитиш
бефойда

1913-yil aprel oyidan chiqa boshlagan



www.zarnews.uz https://www.facebook.com/zarnews.uz @zarnews_uz https://twitter.com/zarnews_uz

Самарқанд вилояти ҳокимининг ҚАРОРИ

Халқ депутатлари вилоят Кенгашининг олтинчи чақириқ эллик еттинчи сессиясини чақириш тўғрисида

"Маҳаллий давлат ҳокимияти тўғрисида"ги Ўзбекистон Республикаси Қонунининг 17-моддасига асосан
ҚАРОР ҚИЛАМАН:

1. Халқ депутатлари Самарқанд вилояти Кенгашининг олтинчи чақириқ эллик еттинчи сессияси **2022 йил 18 февраль кuni соат 10:00 да** чақирилсин.
2. Сессия кун тартибига қуйидаги масалалар киритилсин:

- вилоят ҳокимининг ўринбосари Х.Очиловнинг вилоятда ёшлар муаммоларини ўрганиш, уларнинг ҳал этилишига кўмаклашиш, ёш авлоднинг истеъдоди ва қобилиятларини ривожлантириш бўйича қўшимча шароитлар яратиш юзасидан амалга оширилган ишлар тўғрисидаги ҳисоботи;
- вилоят ҳокимининг хотин-қизлар масалалари бўйича маслаҳатчиси С.Жумаеванинг Ўзбекистон Республикаси Президентининг 2021 йил 5 мартдаги "Хотин-қизларни қўллаб-қувватлаш, уларнинг жамият ҳаётидаги фаол иштирокини таъминлаш тизимини янада такомиллаштириш чора-тадбирлари тўғрисида"ги ПҚ-5020-сонли қарори ижроси юзасидан ҳисоботи;
- ахборот технологиялари ва коммуникацияларни ривожлантириш вазирлигининг вилоят ҳудудий бошқармаси бошлиғи Д.Хўжамбердиевнинг вилоятимизда ахборот технологиялари соҳасида амалга оширилган ишлар, шунингдек, аҳолининг Интернет тармоқларидан эркин ва тезкорлик билан фойдаланишига оид қонунчилик ҳужжатлари ижроси тўғрисидаги ҳисоботи;

- Ўзбекистон Республикаси Президентининг 2021 йил 16 июндаги ПФ-6247-сон фармони ижроси бўйича вилоят ахборот ва оммавий коммуникациялар бошқармаси бошлиғи М.Ибодуллоевнинг вилоят ташкилотлари фаолиятида очиқлик ва шаффоқликни таъминлаш юзасидан амалга оширилган ишлар ва белгиланадиган вазифалар тўғрисидаги ҳисоботи;

- вилоят қурилиш бош бошқармаси бошлиғи Л.Хамидовнинг вилоят ҳудудларида шаҳарсозлик норма ва қоидаларига риоя этилиши аҳоли тўғрисидаги ҳисоботи;

- вилоят маҳаллий бюджетининг қўшимча манбаларидан фойдаланиш тўғрисида.

Вилоят ҳокими **Э.ТУРДИМОВ.**

2022 йил 11 февраль

Вилоят ҳокими Э.Турдимов кеча Самарқанд давлат архитектура-қурилиш институтида профессор-ўқитувчилар ва талабалар билан учрашди.

– Юртимизда қурилиш-бунёдкорлик ишлари кўлами кун сайин ошиб бормоқда, – деди Э.Турдимов. – Табиийки, энг сара, замонавий лойиҳаларга, қурилиш ташкилотларига ва мутахассисларга талаб кучаймоқда. Шу пайтгача бу талабни хориз ҳисобига қондиришга, яъни чет элдаги лойиҳа институтларига, архитекторларга, ҳатто қурувчиларга мурожаат қилишга мажбур эдик. Энди ўзимизнинг мутахассисларимиз ўша даражага етмапти, четда малака ошириб келяпти. Олий таълим тизимидаги янгилик ва ўзгаришлар туфайли ўзимизда ҳам замонавий фикр-лайиҳалар ёшлар қатлами юзага келди. Афсуски, улардан, билим ва тажрибасидан самарали фойдалана олмаёпмиз. Ҳайкалтарош, архитектор, дизайнер керак бўлса, шу соҳанинг аввалдан маълум бўлган бир-икки кишиларига мурожаат қилишга ўрганиб қолганмиз. Ёшларни эшитмаймиз, уларнинг гоялари билан қизикмаймиз.

Учрашувда вилоят ҳокими институт иқтидорли талабаларининг мунозара клубини ташкил этиш ва энг яхши гоя, ташаббусларни ўрганиб, уларни биргаликда муҳокама қилиш зарурлигини таъкидлади. Шунингдек, бундан буён вилоят шаҳарсозлик кенгашининг йиғилишларига иқтидорли талаба-ёшлар таклиф этилиб, уларнинг фикрлари эшитилади. Институтнинг ўзида ҳам бадий-техник кенгаш ташкил этилади.

Институт ректори Чидем Тўрқийилмаз ушбу ташаббусни қўллаб-қувватлаб, клубга Туркиядаги етакчи олий ўқув юртли профессор-ўқитувчилари ва мутахассислари таклиф этилишини билдирди.

СамДАҚИ талабаларининг мунозара клуби ташкил этилади



ТАЙИНЛОВ



Маматов Раҳмат Тошназарович вилоят ички ишлар бошқармаси бошлиғи этиб тайинланди.

Р.Маматов меҳнат фаолияти давомида ички ишлар идораларида мастул вазифаларда ишлаган. Жумладан, Ички ишлар вазирининг биринчи ўринбосари, Хоразм, Фарғона вилоятлари ички ишлар бошқармалари бошлиғи бўлган.

Мазкур тайинловга қадар Маҳалла ва оилани қўллаб-қувватлаш вазирлигида ишлаб келаётган эди.

Шу пайтгача вилоят ИИБга раҳбарлик қилиб келган Шавкат Раҳмонов Наманган вилояти ИИБ бошлиғи этиб тайинланди.

Президент қарорига кўра

Чорвачилик хўжаликларига энгилликлар берилади

Президентимизнинг 2022 йил 8 февралдаги "Чорвачиликни янада ривожлантириш ва чорва озуқа базасини муस्ताҳкамлаш чора-тадбирлари тўғрисида"ги қарорига кўра: пахта ва ғалла етиштирувчи субъектлар томонидан 2 миллион гектар суғориладиган ер майдонининг 10 фоизда алмашлаб экиш таъминланади.

2022-2023 йилларда ҳар бир туманда камидан биттадан гўшт ва сут маҳсулотларини етиштирувчи ва қайта ишловчи корхоналар томонидан аҳоли хонадонларига кооперация усулида чорва моллари етказиб бериш ва етиштирилган маҳсулотларни қайта ишлаш ва сотиш ташкил этилади.

Тадбиркорлик фаолиятини қўллаб-қувватлаш давлат жамғармаси ҳисобидан чорвачилик лойиҳалари учун ажратилган 20 миллиард сўмгача кредит фоизлари Марказий банкнинг асосий ставкасидан ошадиган, лекин 8 фоиз пунктдан кўп бўлмаган қисмига компенсация ҳамда кредит суммасининг 50 фоизи миқдорда кафиллик берилади. Чорвачилик йўналишида жалб қилинадиган халқаро молия институтларининг кредит маблағлари 10 йил муддатга 3 йил имтиёзли давр билан ажратилади.

2022 йил 1 январдан 2023 йил 31 декабргача қўшилган қиймат солиғи тўловчиси бўлган чорвачилик хўжаликларига (аҳоли хонадонлари билан биргаликда кооперация усулида) (гўшт учун) йирик ва майда шохли қорамоллар

тирик вазнининг ҳар килограми учун субсидия миқдори 2000 сўмдан 4000 сўмга ҳамда сутнинг ҳар бир литри учун 200 сўмдан 400 сўмга оширилади. Бунда, субсидия қўшилган қиймат солиғидан вақтинчалик озод қилиш бўйича имтиёз амалда бўлган давр учун ҳам тўланади.

Озуқа экин майдонларида ёмғирлатиб ва томчилатиб суғориш технологияларини жорий этган чорвачилик хўжаликларига ҳар бир гектар учун 8 миллион сўмдан субсидия ажратилади. Гидропоника усулида чорва молларига озуқа етиштириш ускуналарини харид қилиш харажатиининг 20 фоизи республика бюджети ҳисобидан қоплаб берилади. Бунда, мазкур ускуна қийматининг 100 миллион сўмдан ошмаган қисми қопланади.

Тадбиркорлик субъектлари хориздан олиб келадиган, ишлаб чиқарилганига 5 йилдан ошмаган (озуқа экинларини экиш, йиғиш ва тайёрлаш) кишлоқ хўжалиги техникалари, уларнинг бутловчи буюмлари ва эҳтиёт қисмлари, 2025 йил 1 мартга қадар божхона тўловларидан (қўшилган қиймат солиғи ва божхона расмийлаштируви йиғимларидан ташқари) ва утилизация йиғимидан озод қилинади. Тадбиркорлик субъектларига "эркин муомалага чиқариш" божхона режимига жойлаштирилган санадан бошлаб қўшилган қиймат солиғини 180 кунгача бўлган муддатга кечиктириб тўлашга рухсат берилади.

СЎРАГАН ЭДИНГИЗ

Шу куннинг муҳим саволларига мутахассисларнинг жавоблари

Пенсияга оид қонунчиликда янгилик

Қонунчиликда аёлларнинг пенсияга чиқиши билан боғлиқ ўзгариш бўлди, деб эшитдим. Ушбу янгилик ҳақида батафсил маълумот берсангиз.

Г.РАШИДОВА, Иштихон тумани.

Амалдаги Меҳнат кодексининг 234-моддаси 5-қисмида "болани парвартириш таътиллари даврида аёлнинг иш жойи (лавозими) сақланади. Бу таътиллари меҳнат стажига, лекин ҳаммасини жамлаганда кўпи

билан 3 йил, шу жумладан, мутахассислиги бўйича иш стажига ҳам қўшилади", дейилган.

Яъни, аёллар бола парвартириш таътилида бўлганда, бу давр 5 йил бўладими ёки 10 йилми, кўпи билан 3 йили меҳнат стажига қўшилди.

Яқинда бу тартиб ўзгарди. Жорий йил 9 февралда "Фуқароларнинг ва тадбиркорлик субъектларининг ҳуқуқлари кафолатлари янада кучайтирилиши муносабати билан Ўзбекистон Республикасининг айрим ҳужжатларига ўзгартиш ва қўшимчалар киритиш тўғрисида"ги қонун қабул қилинди.

Қонуннинг 2-моддасига асосан Меҳнат кодексининг 234-моддаси 5-қисмидаги "3 йил" деган сўзлар "6 йил" тарзида ўзгартирилди. Энди аёлларнинг бола парвартириш таътилида бўлган даврининг 6 йили меҳнат стажига ўтади.

Яъни, аёл биринчи фарзанди учун 2, кейингисига ҳам шунча вақт бола парвартириш таътилида бўлса, аввалгидек 3 йили эмас, балки тўлиқ 4 йили ҳам меҳнат стажига киритилади. Агар кейинчалик яна туғруқ ва меҳнат таътилига чиқадиган бўлса, пенсияга чиқишда бу даврдан ҳам 2 йил меҳнат стажига олиш ҳуқуқи бўлади.

А.РАҲИМОВ, бюджетдан ташқари пенсия жамғармаси вилоят бошқармаси бўлим бошлиғи.

Нима учун автомашинани техник кўриқдан ўтказиш керак?

Вилоятимизда 671 та автокорхонанинг 272 таси яққа тартибдаги тадбиркор бўлиб, улар ҳисобидан 535 та автобус, 104 та микроавтобус, 7843 та энгил машиналар бор. Йилига 9174 та транспорт воситаси техник кўриқдан ўтказилади.

Вазирлар Маҳкамасининг 2021 йил 9 мартда қабул қилинган «Транспорт воситаларини мажбурий техник кўриқдан ўтказиш тартибини такомиллаштиришга доир қўшимча чора-тадбирлар тўғрисида»ги қарорига мувофиқ, 2021 йил 1 сентябрдан янги транспорт воситалари техник кўриқдан ўтказилмаслиги белгилаб қўйилган эди. Шунингдек, жисмоний шахсларга тегишли авто-транспортларни мажбурий техник

кўриқдан ўтказиш тадбиркорларга юклатилган бўлиб, ҳаракатланувчи мобил техник назорат линияларидан фойдаланиб келиняпти. Шунингдек, уларга Давлат йўл ҳаракати хавфсизлиги хизматининг «Техник кўриқ» автоматлаштирилган ахборот тизимига кириш имконияти яратилди. Ишлаб чиқарилганига 6 йилдан ошган автомобиллар бир йилда бир марта техник кўриқдан ўтказилади. Шу билан бирга, сентябрдан хоризжий давлатларга чиқадиган транспорт воситаларидан ташқари барча транспортларга техник кўриқдан ўтгани тўғрисидаги талонларни бериш амалиёти бекор қилинади.

Ж.ҚОРЖОВОВ, вилоят транспорт бошқармаси бошлиғи ўринбосари.

Таълим сифати педагог салоҳиятига боғлиқ

2021 йил 3 ноябрь кунини назорат қилиш давлат инспекциясида умумтаълим муассасалари рейтингига бағишланган матбуот анжумани ўтказилди.

Унда 14 ҳудуддаги 207 та туман (шаҳар)да жойлашган 9622 та мактаб фаолияти таҳлили натижалари асосида 2020 йил якунлари бўйича Қорақалпоғистон Республикаси, вилоятлар ва Тошкент шаҳри, шунингдек, туман (шаҳар) кесимида умумтаълим муассасаларининг рейтингини ҳамда туман ва шаҳарларнинг таълим сифати бўйича рейтингини эълон қилинди.

Шундан келиб чиқиб, мактабларда таълим сифати, соҳада амалга оширилаётган ислохотлар самараси ҳамда тизимдаги асосий муаммолар ҳақида Таълим сифатини назорат қилиш давлат инспекцияси умумий ўрта ва мактабдан ташқари таълим муассасаларини аттестациядан ўтказиш бўлими бошлиғи Равшанбек ЭРГАШЕВ билан суҳбатлашдик.

– Ўтган йил умумтаълим муассасалари рейтингини ҳудудлар бўйича энг юқори ўринларни Навоий, Бухоро вилоятлари ва Тошкент шаҳри эгаллади, – деди Р.Эргашев. – Энг охириги ўринларни Қашқадарё, Сурхондарё ва Тошкент вилоятлари банд этди.

2-, 3-, 4-саҳифаларга қаранг!

Ҳафта ёғингарчиликсиз ўтади

Бугун ҳаво ўзгарувчан бўлиб, ёғингарчилик кутилмайди. Айрим жойларда туман тушиши мумкин. Ҳарорат кечаси 2-7 даража совуқ, кундузи 0-5 даража илиқ бўлади.

16-17 февраль кунлари ёғингарчилик бўлмайди. Шамол 7-12 метр секунд тезликда эсади. Кечаси 2-7 даража совуқ, кундузи 0-8 даражача илиқ бўлади.

18-19 февралда кечаси 0-5 даража совуқ, кундузи 6-13 даража илиқ бўлади.

Вилоятнинг тоғли ҳудудларида 18 февралгача қор қўшиш хавфи мавжуд.

Самарқанд гидрометеорология бошқармаси.

